

張三豐全集

江左書林印

雲水前集序

雲水前集者我三丰先生在元明間所作者也永樂時胡廣等收入大典之內世間少得其本嘉靖中詔求方書仍從大典中繙出梓行頒示國師等等錫齡於康熙五十九年得此本於揚州書肆寶而藏之即花谷藏書也後有起者將此板刊出必能傳某人讀其詩知先生之清風高節爲不可及也圓通弟

子謹識

雲水後集序

雲水後集者錫齡與先生相遇後所作者也先生神游天海興好朗吟或來劍南道署必有新詩垂示集而抄之裒然成卷異日與前集並刊以誌先生鴻印庶幾見我先生之神妙也夫

圓通弟子謹跋

雲水三集序

雲水三集三丰先生再游劍南之作也雍正間先生來此提撕  
夢九觀察嘗往還於高標凌雲觀察去而先生隱矣邇來圓陽  
老人卓庵居士及遯園蟠山諸埜客志在山林性耽泉石隱士  
生而先生又至矣青城大峩之間或遇老樵子木石逍遙或遇  
老漁夫溪山吟嘯緇衣黃冠種種變化久之而乃知其中有先  
生在此亦我曹之幸也先生法相不輕示人即示人人亦不識  
清詞妙語惟事筆談不言吉凶禍福不語黃印丹砂其所常談  
者忠孝仁慈謙和清淨而已間或放詩爲歌響過雲水飛吟既  
久墨記日多爰梓而存之使人知神仙之樂只如是已又何異  
焉

張三丰先生全集卷五

漢嘉長乙山人李西月重編 張道淵子深氏敬書

侄 瑛春城

閩中朱道生晚成子敬刊 朱瓚素園仝校字

男 璜蟠溪

雲水集

大峩遇夢九觀察口占贈之

上界神仙吏。人間大隱來。爲民祈雨降。  
何日御風回。石向蓬山卧。桃曾閩苑栽。  
功成歸去好。早早煉靈臺。

赴西池仙會

十洲三島會羣英。跨鶴驂鸞到碧城。

劍佩聲飛琳闕遠。爐煙氣繞貝宮清。  
黃金殿上繙金籙。白玉堂前奏玉笙。  
照室明珠千萬顆。修身自幸得長生。

天外來

天外來。天外來。衣冠全不染塵埃。  
鶴背翻雲空宇宙。龍涎噴雨出山隈。

游峩眉小雷門

行穿野外入雲根。自有青松鎖洞門。  
石壁倒流千丈水。道人清坐釣磯溫。

又

白雲深處復閒行。鐵笛吹橫嶂有聲。  
樵子尋余尋不得。化爲奇石古先生。

訪夢九石堂溪上清暉精舍

綠陰門掩道人家。烟篆隨風一縷斜。

洞裏酒香流竹葉。溪邊春過失桃花。

只餘我輩顏長好。縱遇塵埃慢可遮。

到此乾坤真別有。山林試馭五雲車。

快快吟

快快快。紅塵外。閒閒閒。白雲間。妙妙妙。松崖一聲

嘯。來來來。蓬島瑤花開。

石室山用五言全仄書石上

盡日坐石室。古洞自寂寂。竹隱數萬筍。

綠逕少過客。鳥語喚卓午。氣靜倚翠壁。

踏到水澗外。鹿步響木葉。忽見伐木者。

對面兩靜立。問我姓與字。一笑不可識。

過圓通靜室

今夕春風分外清。風來畫閣響簷鈴。  
落花滿地何人識。呼起紅燈照綠櫺。

題夢九丹房集古

樓觀滄海日。壁挂崑崙圖。

大隱在朝市。塵中一丈夫。

鬧中苦

鬧中苦況極淒涼。塵海悲歌泣數行。  
世事如棋不易着。人情似膽最難嘗。  
問誰解得風波險。游子相逢面目蒼。  
我願浮生多息足。白雲深處樂無央。

靜中樂

靜中樂事倩誰傳。魚鳥親人喜欲顛。  
野步安閒真福地。山居快活即壺天。  
將雲補嶂浮青竹。引水通池養白蓮。  
都是一般清意味。誰知幽客自陶然。

留題天竺院賜葉居士

將去又留半刻談。春風回繞徑三三。  
不知門外閒花落。細撥爐灰坐小庵。

山行

細雨空濛碧嶂深。好山無數影沉沉。  
蕭然野寺人踪少。草滿仙壇靜道心。

自述與汪子

做盡瘋狂妝盡歎。歸真守道遠塵埃。  
風波險處抽身轉。水月光中鑑面來。  
山頂時聞元鶴嘯。石頭小坐白雲陪。  
者般景象誰能得。說與同門笑眼開。

採蓮歌

蓮葉蓮花正滿塘。納涼人坐水中央。  
忽聞艇子撐煙外。盪得芙蓉滿澗香。

聽夢九子思敏讀書

最宜聽是讀書聲。隔院傳來字字明。  
楊柳當窗草滿地。春宵雨過一齋清。

簫雲歌賜夢九

君莫羨鴻行遠鶴翥空。君莫跨豹披霧虎嘯風。  
聽我歌一

曲。其氣更能熊。渥漣余吾生青龍。是名天馬馬之雄。  
西涉流沙數萬里。一蹴上與青雲通。雲程迢迢。雲氣濛  
濛。雲衢渺渺。雲影溶溶。忽然幾陣罡風吹入四滄上。  
直踏十三萬仞來蒼穹。噫嘻乎。快不可追。高不可及。  
惟有仙之人兮與爾長相後。

御鳳吟

生不願歌大風懷壯士。亦不願乘長風破萬里。嘗願身如  
古列子。仙乎仙乎其樂只。今日道成有如此。飄飄然。  
泠泠然。浩浩然。憑虛風而不知其所止。

能仁院留題

漠漠連朝雨。濛濛萬樹雲。江聲隨岸轉。  
漁唱隔溪聞。天地詩中大。樓臺畫裏分。

綺窗斜倚處。仙客遠塵氛。

晚晴

小雨收回遠嶂青。晚來秋氣滿中庭。  
明朝縱有晴光到。也帶清涼入翠屏。

靜室

地隔紅塵隱綠蘿。靜中時聽雨聲多。  
來朝旭霽開空碧。笑策雲駢上大羅。

題夢九院中

小乾坤裏大乾坤。中有吾家不二門。  
勸汝世間求道客。休從塵海走渾渾。

初秋夜行千風寺聽人彈琴

新雨滌殘暑。早秋生嫩涼。夜游黃葉寺。

人唱白雲鄉。梵磬沈方丈。龕燈照法堂。  
愛他彈綠綺。清韻自琅琅。

紫芝洞題石

江雲濕。江天碧。烟外鍾聲初歇。木蒼蒼。山寂寂。拄  
杖閒觀如鶴立。洞門瑤草封丹室。靜中誰識古仙客。

晚景

月黑山深虎嘯風。壯大行過劍光紅。  
神仙採藥歸來晚。聽得樵歌唱水中。

長清院

春雨春烟兩度游。都於小院暫勾留。  
乾坤事事皆如寄。花酒閒吟樂自由。

示夢九

得劍除煩惱。彈琴引靜機。  
道心從此悟。流水過漁磯。

山行戲裝地仙狀

披烟容過蓑衣嶺。冒雨人歸斗笠山。  
莫道龍蛇捉不住。長歌已在白雲間。

山行夜過清暉閣

拍手時吟嘯。徐徐度翠微。  
萬嶂濕雲飛。夜閣琴聲靜。  
秋階草色肥。泠然清興遠。  
倚樹立險扉。

九峯山

渡江飛上翠微顛。九頂濛濛秀入烟。  
我自清音亭畔望。東來一鶴似坡仙。

閒眺

山借雲霞藏峻骨。水將舟舫送行人。  
乾坤一覽饒吟興。造物原來各有因。

初春

春風送我鶴車馳。又到仙壇小集時。  
新李初含雪白蕊。嫩桃都放水紅枝。  
隔年乍別重相聚。今日齊逢笑咏詩。  
不用拘拘守繩尺。乾坤烟裏盡堪思。

岳陽樓晚步

蟲聲唧唧透牕幽。一片新涼已似秋。  
殘雨尚聞檐際落。莫將長笛倚高樓。

歸去來

歸去來兮歸去來。蓬宮雲散月華開。  
身騎黃鶴九千里。到此丹臺半夜殘。

石帆山高道士草庵

清夜焚香愛我廬。蒲團打坐樂何如。  
月光飛到秋牕外。笑捲疎簾看道書。

又

雲擁寒山山擁廬。道心澄靜自如如。  
鶴閒虎卧松崖下。採藥歸來又讀書。

又維揚口占三絕晚韻動人

秋山隱隱水迢迢。放艇閒吟廿四橋。  
綠柳千行鴉萬點。夕陽紅處聽吹簫。

又

瓜步潮聲挾雨聲。秋隨鴻雁到蕪城。  
祇今明月二分去。猶愛吳儂度鳳笙。

又

人生到處足遨遊。莫把塵埃老黑頭。  
手握金丹抵萬貫。公然跨鶴出揚州。

游陳道士菊軒

路轉東籬一杖斜。晴光滿地照黃花。  
綠樽映日圖元亮。烏帽臨風寫孟嘉。  
三徑草生塵跡少。兩畦烟散野陰遮。  
道人負手行歌處。不見峯巒露髻了。

詠紅葉示人

草木無情却有情。丹楓烏栢可憐生。

登樓笑指寒山醉。倚檻初疑小雪晴。  
真氣已枯空有色。夕陽相對總無聲。  
峯間獨愛梅花好。守白凌霜體自貞。

西峯亭

夜月歸來客掩闌。江亭流水響空山。  
倚樓長嘯鶴聲起。天外孤烟嶺上還。

山中吟

山中古日月。壺裏大春秋。願他急早賦宜休。  
若不休時總是愁。愁愁愁。白了人頭。

臣瀘破子中行

橋窄讓人先過去。天空由我獨飛行。  
新詩兩句傳心跡。又見吹來海月清。

游戲

來來往往原無礙。往往來來度有情。  
醉跨蒼龍游玉宇。閒呼白鶴到瑤京。  
上天陪得高真坐。下地能隨尚者行。  
木葉做衣雲作笠。神通自在屬先生。

廬山雨後題石

飛瀑懸崖石。一落一千丈。驟雨洗煙嵐。  
一峯一屏墀。海風吹我來。山雲隨我上。  
頭簪瑤草花。口誦漁家唱。拍掌而登樓。  
幽閣琴聲亮。信筆寫龍蛇。字字作活像。  
欲識我爲誰。筆架峯頭望。

過三香閣贈居

嗶嗶虎嘯出山岡。課課魚聲響佛堂。  
最是梅花疎月外。儒書讀到五更長。

與夢九

我唱無根却有根。琪花瑶草欲封門。  
洞中藏得小天地。睡倒盤陀石上溫。

能仁院

風捲殘黃落滿山。老僧晏坐掩柴關。  
蠟梅一樹香於雪。白晝無人我更閒。

游南峯

山如好友常謀面。水似行人屢掉頭。  
綠黛重重波曲曲。教儂一步一勾留。

題陳道人

捲簾相與看新晴。小閣茶煙氣味清。  
朗誦黃庭書一卷。梅花帳裏坐先生。

又

先生丰度自高寒。頭戴方巾兩足盤。  
欲向晴峯看雪霽。起身携杖挂蒲團。

梅嶼

北風吹雪古雲寒。嶺上梅花此際看。  
三百樹頭飛片片。一時回舞到林端。

馬蹄月

馬蹄月。馬蹄月。人事奔波。勞勞碌碌。  
不識紅塵苦。豈識清虛樂。清虛樂。蒲團打坐。  
焚香一炷。彈琴一曲。

黃山題石

天外風吹鶴。池中水見龍。  
我今長嘯去。三十六雲峯。

石生泉

鑿石得清泉。泉流仍洗石。  
戴笠出山來。一笑空煙碧。

天亭山

亭亭天亭峯。跨鶴上崖去。  
空山靜無人。獨與雲楓遇。

自題畫像

風日清於酒。水雲淡若詩。  
乾坤壺裏坐。這箇老仙師。

四言

性田無翳。心地自明。雨餘山色。厯厯空青。

再過臺城

再訪臺城路。重搖兩槳游。鴉啼疎柳岸。  
蟬噪六朝秋。曲水環京口。奇峯抱石頭。  
青鞋無皂帽。笑眼對輕鷗。

遊戲吟

遊戲紅塵下翠微。神仙事業只慈悲。  
平心付物原非天。信手敲詩不用推。  
龍氣遠昇雲片片。鶴聲高詠塚累累。  
願人共悟長生理。天海飛吟樂唱聲。

題圓通綽綽山房

有餘退步留遐福。無事抽身乃達人。  
淡雨微雲風蕩漾。鶯花天氣正沉吟。

又

花到二分逾秀勁。月當十四已團圓。  
及時兩字人能會。便得逍遙快樂天。

雲水集

登華表山

華表山高爽氣凌。令威騎鶴此飛昇。  
乍看雨脚從空至。未必雲頭阻我登。  
獨立峯巒心曠遠。遙觀渤海興奔騰。  
他年願步丁公後。長嘯蓬邱第一層。

游遼陽諸山作

千里遼陽自往還。眼中山色畫中看。  
人跨地氣來長白。我欲雲峯煉大丹。  
風過列屏橫淡靄。雨餘羣嶂各高寒。  
此間好覓長生路。入世休言出世難。

甲子秋游燕京作

我不願登黃金臺。我只願飲黃花杯。  
醉裏昏昏忘天地。古今名利總塵埃。  
休馳驟。且悲哀。早將壯歲塵緣了。  
五岳三山歸去來。

呈廉閣老

真人不露真。玄門不露玄。方士乃何物。  
自獻徒紛然。堯舜享高壽。無爲靜也專。

幾曾餌金石。而乃得遐年。我愛廉夫子。  
忠悃心拳拳。上書攻異教。肝同鐵石堅。  
吾家有二老。至今作天仙。子房師辟穀。  
志和隱釣船。素與天子近。不談汞與鉛。  
功成身勇退。英雄則有焉。帝王自有事。  
豈在白雲邊。凡爲大臣者。孔戒必當先。  
我愛廉夫子。正氣如孟賢。時人有廉  
孟子之目

題止善堂呈主人

半點塵埃不許侵。四圍垂柳正陰陰。  
主人自是能知止。無物能搖至善心。  
廉平章以書薦余名於劉仲晦太保感而詠此  
賢與賢相近。得逢推薦人。愧非梁棟質。

名動帝王臣。有意求勾漏。無心據要津。  
辭尊往說法。願現宰官身。

送廉公之江陵

我有老親。頭已白矣。我得微官。公之德矣。  
公自愛才。我非貪祿。公往江陵。民皆受福。

博陵上仲晦相公

姓字勞公記。山人入宦場。一官容懶散。  
百姓盡淳良。囹圄生秋草。男兒思故鄉。  
別求賢令尹。吾不坐琴堂。

有感

毛義從茲隱。葛洪豈戀官。欲尋李太白。  
同說大還丹。家國伊人任。孤哀獨我單。

潛然雙淚落。飛雁影高寒。

答劉相公書

太平良宰相。千古能幾人。青囊乃餘事。不愧帝王臣。  
得公一語重千金。公書賜我我動心。所言地理無人識。  
惟我默默信其深。公何爲者重賤子。此恩此德提吾耳。  
公東來時獨憾遲。親骸已葬不敢起。長白幹龍數千里。  
我從小幹藏之矣。不望名。不望利。祇望吾親安斯地。  
穴城大山宮小山。門有仙橋獲我意。以此答公公諒之。  
莫云小子強陳詞。他日訪公邢州道。八盤山下請公思。

讀先子房傳有感

紛紛六國衆諸侯。掃入秦疆漢又收。  
若使沛公如項羽。子房未必肯依劉。

家居無事忽有邱道人見訪臨別詩以贈之

我見先生方外來。先生見我笑顏開。  
無官自合尋黃石。有客何妨共綠醅。  
出世心從天海落。入山興與岳雲回。  
幾時佩劍携長笛。相訪高真到碧臺。

遙輓劉仲晦相公時至元十一年冬月初旬也

博學其餘事。今之古大臣。澹然忘嗜慾。  
高矣脫風塵。舉世誰知我。登朝屢薦人。  
八盤他日過。甬酒奠公神。

三十二歲北遊

幽冀重來感慨忘。烏紗改作道人裝。

明朝佩劍携琴去。却上西山望太行。  
西山大別作也

上曲

疎柳蒼黃盡夕曛。悠悠瀨水淨塵氛。  
芒鞋獨上堯峯頂。西望常山只白雲。

恒嶽

畢昴精凝處。恒山氣象高。藤蘿牽絕壁。  
松柏吼飛濤。朔野何空闊。靈風乃怒號。

結廬仙嶺上。望裏興飛豪。山有望  
嶺

悠悠歌北嶽作時至元三十  
年甲午歲也

悠悠歌。悠悠歌。四十八歲空銷磨。人生壽命能幾何。  
株守恒山十六載。燕趙往來成游波。到不如携琴劍。整  
笠蓑。東走蓬萊唱道歌。

東游

此身長放水雲間。齊魯遨遊興自閒。  
欲訪方壺圓嶠客。神仙萬古住三山。

贈棠邑令家希孟弟

我到清河上。棠花處處開。老兄騎虎出。  
吾弟跨鶴來。政事由求侶。乾坤宰相才。

四知長不愧。相與坐斯臺。治內築有四知臺

游岱宗步希孟弟原韻

軼蕩天門上石闕。人生到此拓雄觀。  
西岸宛峙神仙阜。東海誰投任子竿。  
七十二家封禪古。三千餘里範圍寬。  
與君共坐秦松下。一陣天風撲面寒。

日觀早起觀日

天雞一唱海門開。日湧波濤出海來。  
萬里眼光紅不斷。三山頭腦綠成堆。  
遙聞笙鶴從空降。只見雲龍帶雨回。  
別有飛仙揮塵塵。令人企首望蓬萊。

山中尋張忠高隱處有作

巖棲谷飲舊家風。令我尋翁不遇翁。  
仙阜一聲發長嘯。白雲飛在太山中。

丹巖山

丹巖頂上蓬萊閣。可望蓬萊不可即。  
天風海水蕩心胸。蒼蒼浪浪自開闔。  
我到東牟眼界空。詩情豪放若英雄。  
朝瞰遠出扶桑外。樓臺貝闕金銀宮。

拍手長歌雲鶴起。仙人冉冉來前矣。  
把杯祭海祝海神。爲展光明千萬里。  
遙情欲觀海外天。天浮清際海無邊。  
欲駕颺車飛過去。未能羽化心茫然。

徂徠山

百丈奇巒百樹松。松松古幹走老龍。  
山中六逸今安在。幾度言尋到此峯。

河東

三年步履遍河東。戴月披星兩袖風。  
登山笑倚一根竹。遇水閒彈三尺桐。  
海嶽幾時逢道侶。塵寰何處訪仙翁。  
不如覓箇安閒地。了了忘忘養寸衷。

雷澤晚行

水複山重路渺茫。  
此中應是白雲鄉。  
晚來獨自行雷澤。  
明月清風望首陽。

游中條山

九天浮翠鬱嵒崑。  
綠笠青簑映碧霄。  
欸欸心兒思上界。  
翩翩羽客到中條。  
脚頭不用黃河濯。  
肩臂常將白日挑。  
兩片飛鳧輕似鶴。  
王官谷裏過溪橋。

中州紀行

中州南北遍尋真。  
到處高歌弔古文。  
滾滾烟飛卿相宅。  
茫茫日落帝王墳。  
身如斷梗隨流水。  
臂負瑤琴帶夕曛。

來日又從河內去。袖中携取太行雲。

王屋山

海內大洞天。王屋稱第一。終古飛白雲。  
至今護元室。巖壑響笙簧。峯尖挂日月。  
我欲結茅居。煉取神仙質。

嵩嶽

重離大火開丹壁。表正中州真峻極。  
仙靈隱隱立三臺。太少峩峩分兩室。  
我今訪道如青蓮。奇峯六六造其巔。  
石上彈琴思縹緲。雲中飛鶴舞翩翻。  
忽然口渴憶玄酒。手掬山泉聊漱口。  
晚來明月挂溪松。松濤幾陣如雷吼。

靜中有動動偏閒。椰瓢棕拂坐巖間。  
不遇真師亦快活。留將鴻爪記嵩山。

西游

胸中五嶽侍全探。秦岱恒嵩已過三。  
今日更登西華去。白雲開處望終南。

關中旅寺有懷

拋到家山處處遊。塞雲關月幾經秋。  
丁公有志歸華表。子晉何時返故邱。  
今日渭南如旅雁。去年河北似浮鷗。  
溪泉放艇尋詩句。兩岸風篁幾萬頭。

華嶽

巉巉大華俯全秦。百二河山此地尊。

雲起謫仙搔首處。雨過神女洗頭盆。  
閒從翠嶂尋松實。醉看青天枕石根。  
我愛希夷高卧蹟。應携後進入玄門。  
扶風明月山中有清風洞過而口占  
明月山頭玩明月。清風洞口坐清風。  
吟風嘯月吾將老。對月聽風響未終。

寶雞晚行

倏爾游秦鳳。飄然到寶雞。  
路隨流水遠。山壓暮雲低。  
對面三峯立。闕心一椀棲。  
結茆聊息足。吾亦老磻溪。

小廬題壁

陳倉山下道人家。不種桑田不種麻。

埋姓埋名藏僻地。自薪自汲老生涯。  
幾重石嶂撐如虎。一箇茅廬小似蝸。  
氣健身強年已暮。乾坤何處問丹砂。

書懷

心命惶惶亦可憐。風燈雨電逼華年。  
不登閬苑終爲鬼。何處雲峯始遇仙。  
九死常存擔道力。三生又恐落塵緣。  
辦香預向終南祝。應有真人坐石邊。

終南呈火龍先生

白雲青靄望中無。已到仙人碧玉壺。  
拚却芒鞋尋地肺。始瞻大道在天都。  
乾坤二氣藏丹室。日月兩丸曜赤爐。

實與先生相見晚。慈悲乞早度寒儒。

出終南二首

生平好善訪仙翁。十萬黃金撒手空。  
深謝至人傳妙訣。出山尋侶助元功。  
一簍一笠下終南。雲白山青萬象涵。  
他日大丹鎔煉就。重來稽首拜仙庵。

丹成作歌

洞裏深藏太古春。心虛氣靜養元神。  
直尋世外千年藥。口唱藍仙踏踏歌。  
一箇葫蘆無價寶。兩川風月安樂窩。  
山林廛市遨遊遍。到處題詩認得麼。

由夔府下江陵作

十二巫峯歷歷遊。夔門長嘯下荊州。  
朝吟落月峩眉磧。暮對斜陽燕尾洲。  
山水蒼茫懷道侶。乾坤浩盪少仙儔。  
不如自跨遼東鶴。乘興還鄉省故邱。

遼陽積翠村二首

手執長弓逐鳥飛。是誰知是老翁歸。  
白楊墓上留詩句。城郭人民半是非。  
紛妙景象亂如麻。身世初完早出家。  
莫待巢危復累卵。功名勢利眼前花。

燕趙閒游晤邱長春遂同游西山

天寒白日澹幽州。燕市重尋舊酒樓。  
新學瘋狂爲醉漢。故交豪傑已荒邱。

駒光不似壺中日。蟻命猶如水上漚。  
我遇至人談大道。西山晴雪共遨遊。

津門柳

津門柳。津門柳。歲歲年年。絲絲縷縷。長與官家綰別  
離。能縮游仙去路否。一聲長嘯出天津。破衲飄然不回  
首。天外幾行雁。天邊數點舟。江河渟蓄處。廣大不奔  
流。

兩湖吟神似呂相手筆

化作漁翁盪小舟。湖南湖北任遨遊。  
酒乾直欲吞雲夢。吟罷高飛過鄂州。  
萬里遙看吳地月。一聲長嘯楚天秋。  
湘濱老叟相逢笑。手指嘉魚下釣鈎。

嘉魚  
縣名

赤壁懷古

赤壁有數處在嘉魚者乃周郎破曹處也

石壁巉巉壓水隈。三分事業此間開。

龍爭虎鬪今安在。月白風清我又來。

滾滾長江淘日夜。茫茫戰壘激風雷。

興酣欲拉坡仙嘯。吹笛乘舟共往回。

洞庭晤呂純陽先生

這回相見不無緣。先生訪道尋真數十年。

雅度翩翩吹鳳笛。雄風凜凜佩龍泉。

身從海嶽來斯地。手拂湖雲看遠天。

願學先生勤度世。洞庭分別到西川。

爲雨爲雲最有神。莫將塵夢擬真人。

仙環隱隱從空下。一片恩膏一片春。

蜀市題

朝隱青城暮入峩。蜀中來往閱人多。眼看白日忙忙去。  
不惹人間半點塵。時飲蟠桃酒。時採靈芝根。如醉如癡  
氣血生。八兩真鉛汞半斤。月圓花現景難論。捉虎擒龍  
渾易事。先天一炁要殷勤。火候分明度數的。十月功完  
脫聖真。凡愚何處求丹法。此是吾家不二門。

太和山道成口占二絕

太和山上白雲窩。面壁功深似達摩。  
今日道成談道妙。說來不及做來多。  
九年無事亦無詩。默默昏昏不自知。  
天下有人能似我。願拈丹訣盡傳之。

題武當山

七十二峯蒼翠間。武當山色似衡山。  
明朝飛過湖南去。八九峯頭自往還。

衡嶽

今日完全五嶽遊。身騎黃鶴駐峯頭。  
曾於北鎮先尋訪。直到南衡始罷休。  
萬里漫云燕楚隔。兩山剛被坎離收。  
天然道妙同行轍。又看湘波九面流。

登嶽陽樓用杜韻

欲上君山頂。飛吟到此樓。  
一湖南北限。千里水雲浮。

道走河南公卿頗有聞。余名者書此笑之。  
棄却功名浪蕩遊。常將冷眼看公侯。

文官武將皆塵土。綠黛紅妝盡髑髏。  
鶴駕高飛南嶂月。鴉聲亂噪北邙秋。  
離離草色俱凋謝。早向雲山問路頭。

晚步咸陽

天邊飛雁排雲表。我亦長吟咸陽道。  
咸陽古道草迷離。百代王侯盡枯槁。  
西行萬里多感懷。人生豈若神仙好。  
任他滄海變桑田。鶴貌松姿長不老。

帶月過武功飛行至棧

布衲椰瓢欠整齊。夜來飛過渭河西。  
白雲叫破梁山雁。涼月催回魯店雞。  
出世多遊秦蜀路。摩崖自看往來題。

身行險棧如夷坦。始識鸞車勝馬蹄。

### 錦江

江自岷山走蜀都。順流東去出夔巫。  
扁舟願效元真子。更號烟波小釣徒。

### 江上吟

學得漁翁欸乃腔。高歌自駕木蘭艖。  
雲帆歷亂迷三楚。煙水蒼茫過九江。  
收拾乾坤歸小艇。任他歲月付奔龍。  
此身放浪原無定。孤雁凌波影一雙。

### 游廬山

遠望屏峯九疊張。到來初識是仙鄉。  
喚回山虎吟溪月。呼起雲龍抱石梁。

高岸吼時飛瀑布。淡煙浮處滿爐香。  
道人分外添幽興。消受匡廬日月長。

吳越吟

大江南北任浮沉。游遍蘇杭道益深。  
跨鶴吳山容我嘯。飛鸞禹穴避人尋。  
茫茫笠澤藏漁艇。淡淡苕溪洗客襟。  
水秀峯奇吳越路。飄然自背落霞琴。

元杭省左司員外郎家光弼昱廬陵人余游杭州相遇於  
湖自謂將有湖山之志書此壯之

君我相逢姓又同。莫將高尚托虛空。  
而今氣象兼舒慘。自古賢豪善始終。  
千載西湖多隱遯。六橋南渡老英雄。

騎驢放艇留佳話。請與先生道此風。

天目閒居歌

臨安秀氣鍾天日。晨朝自放白雲出。  
石池高注兩峯頭。波光圓淨如日月。  
道家三十四洞天。瓊冊琅函萬古傳。  
結廬小住山之巔。青鸞白鹿共周旋。  
閒來便到杭州去。笑傲湖山得真趣。  
化作游僧倚杖行。三生石上誰相遇。  
梅花嶼。楊柳堤。瑤笙畫舫自東西。  
道人長嘯歸山去。回觀世上煙迷迷。  
贈廣海和尚  
深入浮屠斷世情。奢摩他行恰相應。

天花隱隱呈微瑞。風葉琅琅味大乘。  
室密晝閒雲作蓋。庭空夜靜月爲燈。  
定中萬象無何有。到此誰能見老僧。

遇家伯雨外史杭州人

看破浮生遠市寰。歌聲踏踏上茅山。  
老兄贈汝無他物。惟有仙家一味閒。

游金陵贈沈萬三

秦淮落落大漁家。看破浮雲似暮霞。  
乘月泛舟沽綠酒。感君從我問丹砂。  
黃中妙理何人識。白下英雄此箇跨。  
願把貲財參道法。一堂妻子不咨嗟。

別萬三

羣雄擾擾盡征戡。我與先生把道談。  
今日東南王氣盛。他年晤子到西南。

西湖二首

湖上紅亭亭上人。亭前水寫眼前身。  
青簑綠笠何爲者。我是烟波畫裏真。  
人歌人笑滿朱舲。楊柳長亭復短亭。  
卻愛漁翁閒雅甚。自搖小艇到西冷。

贈金粟道人

王山佳處好園亭。多少游人入畫屏。  
驀地將來都撒去。清心澹慮水泠泠。

還蜀吟

六合是我家。二曜爲我燭。我雖遼東人。

游蜀似還蜀。淡淡巫山雲。彎彎峨眉月。  
鮮鮮錦江波。熙熙巴子國。到處闡玄風。  
顛狂自怡悅。鸞馭止何方。又到青城宿。

歸秦

自蜀來秦不避秦。西秦久住似秦人。  
寶雞石上題詩句。誰識逍遙物外身。

大元至正二十六年丙午暮秋金臺觀游魂七日歸來付

楊軌山一偈

詩喻元終明始意蓋二十八年即洪武元年也

元氣茫茫返太清。又隨朱雀下瑤京。

劍床七日魂來復。天下齊看日月明。

入蜀

劍門雄壯蜀山高。飛去飛來鶴亦勞。

萬點蒼尖分厯落。千重碧嶂幾回遭。  
時時牧笛吹秋草。處處樵風吼暮濤。  
最愛峨眉峯頂月。清暉白上道人袍。

漁父詞

湘雨湖雲滿釣蓑。逃名隱姓樂如何。

新日月指明。舊山河指元。成敗興亡莫管他。

洞庭睡到長天曉。誰識高人張志和。

贈焦始謨先生

子陵高屈漢光武。一個客星照萬古。  
如今我見焦先生。高節清操誰爲伍。  
少與皇明乃舊交。風聲洒洒吹許巢。  
故人崛起做天子。幾回丹詔來山坳。

一豚蹄與一壺酒。邈來見帝酬吾友。  
大呼光祿治山肴。對飲哈哈大笑拍手。  
席前三帶角銀金。命公取之觀其心。  
強持角帶作遊戲。幽情默默在雲林。  
朝廷從此稱千戶。先生冷笑何足數。  
飄然拋去入名山。子房永別漢高祖。

余閱山水多年所嘗留意者蜀之大峩楚之武當因各構  
一廬爲往來棲真之所出則青鸞萬里入

則白雲一窩佳夕澄清在武當棲雲廬望大峩留月廬  
作此

楚蜀頻來自往還。結廬高卧兩名山。  
靜中偶動仍非靜。閒裏能安乃是閒。

只候紫書來闕下。細研丹訣度人間。  
武當夜對峩眉月。還憶吾徒已閉關。

棲雲廬閒望

雲木蒼蒼滿翠微。道人閒眺立岩扉。  
猛禽鷲鳥無猜忌。門外衝烟踏葉歸。  
風捲山雲飛過水。雨飄柳絮落殘春。  
精廬鎮日全無事。兩卷黃庭養性真。

閒吟

數聲猿鶴響松闌。坐冷孤雲意欲閒。  
有跡已教同世外。無心何必去人間。  
林陰棋局空殘劫。爐底雌雄見大還。  
流水桃花杳然在。一回頭隔萬重山。

又

天地悠悠一片雲。何心重與結聲聞。  
迷離紅翠花三樹。町疇高低鹿一羣。  
自是清空通沆瀣。不將搖落嘆河汾。  
虛無便把靈臺鑿。混沌由來總不分。

將之巴蜀示門人邱元靖

苦心苦行守棲雲。大道他年寄與君。  
莫舍吾廬輕易出。致教人賦北山文。

題玄天觀寄蜀王

等閒釣罷海中鰲。一笑歸來祖晉陶。  
花吐碧桃春正好。笋抽翠竹節還高。  
心懷鳳闕龍鱗會。身寓龜城馬足勞。

何必終南論捷徑。宦情於我似鴻毛。

成都留題姜氏家

往往來來度有情。葫蘆遊戲錦江城。  
身藏大道無人識。祇愛梅枝插土生。

却聘吟 洪武十八年

流水行雲不自收。朝廷何必苦徵求。  
從今更要藏名姓。山北山南任我游。

讀元故提舉楊廉夫先生集

鐵崖吹鐵笛。清韻滿崖中。末世聲名大。  
深山氣象空。爲文超宇宙。守節老英雄。  
惟有華亭月。清高似此公。

嘗作八遜篇並爲八贊志景仰也今錄其贊於此

嚴子陵光

昭昭嚴光。謙謙光武。帝曰子陵。胡不相輔。  
嚴曰陛下。毋容相苦。歸釣富春。一竿千古。

法高卿真

矯矯法真。千載幾人。只聞其聲。不見其身。  
亦非釣譽。亦非隱淪。孔曰求志。孟曰天民。

陶淵明潛

挺挺陶潛。晉室賢士。五柳可居。五斗難繫。  
帶月而歸。採花而至。柴桑之間。如葛天氏。

戴安道遠

軒軒戴遠。高節自命。抱義而居。卻書而遯。  
謝元一疏。身名兩定。陶然洒然。鼓琴適性。

盧灝然鴻

超超盧鴻。蒿山之巔。逍遙居士。快活神仙。  
賜官不受。賜服不穿。草堂何處。白雲滿天。

軒轅集

落落軒轅。羅浮遠引。木食草衣。雲衾石枕。  
帝以道問。公將道隱。匪同金石。如賣脂粉。

陳希夷搏

浩浩希夷。守正懷奇。不誇丹道。不露元機。  
不令人測。只求已知。華山高卧。吾師之師。

林和靖逋

卓卓林逋。獨有孤山。離塵絕垢。氣慧神閒。  
探梅而去。招鶴而還。不入塵市。長嘯峯間。

以上八讚皆先生自己寫照也風韻高於詩品

外有焦孝然先像讚一首今附於此

皎皎焦先。漢室高賢。或曰隱士。或曰神仙。  
草廬可托。風雷可眠。三詔不起。於戲孝然。

將之雲南先寄故人并序

余自洪武二年己酉至二十四年辛未。居武當二十  
有三年矣。其間着丹經。舒清嘯。晦跡韜光。雲  
來鶴往。近聞沈三山得罪朝廷。徒於滇上。株連  
其壻余君。西南之約。吾其行乎。爰爲此作。先  
慰天南海曲之遷戍者。

壺中日月洞中春。二十三年靜裏身。  
遙知遠徒雲南客。蠹雨蠻風憶故人。

滇南會沈子三山兼贈令倩余十舍  
一家眷屬小游仙。翁壻同居滇海間。  
玉潤郎君余十舍。冰清老丈沈三山。  
都因象齒能爲禍。未觸龍鱗早犯顏。  
今日我來齊度脫。大丹還勝大刀環。

贈沈線陽余飛霞兩女仙

線陽仙女。薛真陽之高徒。沈三山之長女也。弱  
齡出世。父徒雲南。忽來拜省。與余女同服大藥  
。冲舉而去。余女者。十舍令愛。西平侯沐春夫  
人。得母翁外丹之傳。飛霞乃吾賜號也。嘗有小  
傳記之。

十舍非無子。三山亦有兒。仙姑與妹女。

閔苑兩靈芝。服我天元藥。飛昇昆明池。  
老翁開笑眼。吾道屬嬌癡。

夜郎

朝別昆明下夜郎。崇山處處有仙鄉。  
魚年共賽神雞碧。鳥道高飛我鶴黃。  
細徑遙盤闕索嶺。諸峯宛抱武侯岡。  
由來木密多幽地。笑殺南人住此方。

曲靖到黔陽

真峯頂上紫鸞翔。送我看山到貴陽。  
一路飛吟聲未散。先生已過古城鄉。

平越福泉山禮斗吟

此山雲水盡澄清。夜夜焚香表恪誠。

首戴蓮花朝北斗。星君爲我署長生。

由思南過黔江題烏鴉觀

萬里長江渺碧霞。彤雲飛暎到烏鴉。  
崖寒木落仙寰別。水秀山奇景物華。  
游子樓頭傾竹葉。牧童牛背落梅花。  
興來一覽乾坤闊。笑傲湖天歲月賒。

巴嶽山贈僧定一

巴川挺巴嶽。蒼蒼翠幾重。不是匡廬山。  
中有香爐峯。偶焉此駐足。欣與高僧逢。  
我有竹枝杖。變化爲青龍。持以贈禪客。  
他日倘相從。

北津樓在順慶府北五里今詩碑猶存

誰喚吾來蜀內遊。北津樓勝岳陽樓。  
烟迷沙岸漁歌起。水照江城歲月收。  
萬里清波朝夕涌。千層白浪古今浮。  
壯懷無限登臨處。始識閬南第一洲。

凌雲峯

蜀山靈秀屬凌雲。水木清華遠俗氛。  
九頂烟中鸞鳳嘯。仙音不與世間聞。

鶴鳴山

沽酒臨邛入翠微。穿崖客負白雲歸。  
逍遙廿四神仙洞。石鶴欣然嘯且飛。

贈完璞子見訪武當

如吾子者仙豪也。跨虎龍兮壯士哉。

天下往還扶日月。劍端遊戲喝雲雷。  
戰場三奪高煦氣。談笑兩羞廣孝才。  
今日勸君歸洞府。嬰兒還要產嬰孩。

贈王先生歌建文臣也

王先生。忠義全。自號大呆子。亦曰性天然。埋名隱姓  
如瘋癲。或住玉華邱壑內。或住金華山澤邊。山邊村落  
時來往。士人詩酒相周旋。醉後出神思故主。兩眼汪汪  
哭向天。平常衣服與人異。披麻戴笠心事傳。先生間與  
野人言。死後將吾繫樹顛。得非地無乾淨土。一心願做  
鶴巢仙。

答永樂皇帝

皇帝陛下。福德無疆。臣本野夫。

於時無益。荷蒙宸翰。屢下太和。  
車馬數馳。猿鶴相訝。伏願陛下。  
澄心清理。屏欲崇德。民福主福。  
民壽主壽。方士金石。勿信爲佳。  
恭進一詩。乞賜一覽。外附口歌三章。

皆係山人祛欲修身之道。毋視爲異術。則臣幸甚。  
地天交泰化功成。朝野相安治道亨。  
皇極殿中龍虎靜。武當雲外鼓鍾清。  
臣居草莽原無用。帝問芻蕘若有情。  
敢把微言勞聖聽。澄心寡欲是長生。

朝真作

永樂十四年午月  
朔日南極萬壽會也

一朝明主又朝元。南極宮中列綺筵。  
紅日當階呼萬壽。慶雲滿座會羣仙。  
道通卦氣身居兌。名序爻班位讓乾。  
手捧丹書歸福地。度人心事更無邊。

南京道觀崇清寺題壁

千古丹經載聖經。兩言定靜可延齡。  
何須遍處求方術。致使妖書亂典型。

又

煙霞客抱長生訣。山澤臞游不老春。  
誰與皇家談此理。不修治道想修真。

又

天羅已網邵元節。地嶽纔收陶仲文。

他有靈丹應不死。此人既死復何云。

又

玉皇案吏無天子。金闕樓臺屬隱淪。  
我願君王端拱坐。澄思屏欲是玄音。

讀蒲庵集

蒲庵道貌足清腴。話到滄桑每嘆吁。  
不仕他人甘削髮。要還故我且留鬚。  
打鍾得句憑誰賞。飛錫凌空樂自娛。  
一點丹心藏智燭。明光皎皎照昏衢。

隱居吟武當南岩中作

三丰隱者誰能尋。九室雲岩深更深。  
漠漠松烟無墨畫。淙淙澗水沒絃琴。

玄猿伴我消塵慮。白鶴依人穩道心。

笑彼黃冠趨富貴。並無一箇是知音。

西苑宮詞

自注云正德嘉靖間曾受封誥是時宮中日以請鸞為戲故作此詩以存諷諫之意忽

謂神仙不知國體也

西苑無人白晝長。至尊端敬呂純陽。

神仙早已知名分。不受分宜嚴嵩分一炷香。

又

泥金寫疏達瑤池。靜候青鸞降筆詞。

聖駕獨含周穆意。宮人要看女仙詩。

又

張顛請過又周顛。草寫空同至道篇。

天子醮壇開口笑。朕今封汝作天仙。

又

五雲扶輦聖人來。始見通天別有臺。  
此處不行郊社禮。拈香一拜望蓬萊。

雲水三集

重游劍南歌并引

劍南自汪觀察去後余不到嘉州又一百年矣近觀少  
微星朗照乎凌雲烏九青衣長乙之間爰作重游劍南  
詩以誌訪焉

化鸞化鶴化雲烟。又化漁樵與老仙。  
隱顯遨遊度有緣。少微星照九峯巔。  
或尋崖谷詠詩篇。或觀水石弄溪泉。  
或騎黃犢來山前。或抱青琴坐松邊。

不知不悔住林園。不伎不求養性田。  
是皆處士與高賢。我願訪之共周旋。  
妙絕青衣古洞天。峨眉一氣相鈎連。  
倒拖鐵杖尋幽偏。中有數人談自然。  
快哉乎不到劍南今百年。再來猶是張玄玄。

白雲庵

卓午林陰雨氣涼。千竿修竹覆經堂。  
老僧放梵雲初淨。室小身閒日正長。

瀟湘吟

花外風來桂子落。秋氣清空。鴻雁高飛。  
湘水曲。湘水曲。一笛長吹。游仙快樂。

漁父詞

一隻船兒坐卧寬。風波險處自平安。  
雲淡淡。水漫漫。洞庭煙雨當詩看。  
曉來獨坐君山下。只見蘆花撲釣竿。

七夕雨

聽罷緱山子晉笙。又聞秋雨韻琤琤。  
大風吹下天河水。不作淒淒楚楚聲。

游蜀

閬苑歸來蜀地游。一身時被白雲留。  
烟蓑雨笠閒裝束。化個農夫樂自由。

寒冬游峩

携手游峩峩。冬寒生木末。風從北嶂來。  
黃葉滿崖谷。深林折磴中。猶有千秋雪。

與遜園

日日復日日。秘秘復秘秘。有詩徐徐吟。有酒綿綿吸。  
醉中狂笑無人識。綠陰滿地日當欄。與君共坐盤陀石。

農人引

場圃當窗面面佳。客來相與話農懷。  
田家樂。洵不乖。春風春雨到茅齋。

題涵虛金丹詩

仙骨一身筆一枝。興來高唱百篇詩。  
從今更長金丹價。萬兩黃金莫賣之。

泌水洋洋

泌水洋洋見道機。池亭深處看魚飛。  
白雲一片空中去。天外霞光映碧暉。

示槃山

莫要憂來莫要愁。莫將塵慮擾心頭。  
山間明月江中水。滌蕩胸懷萬事休。

雙清閣和髯仙原韻

閣外人來三兩箇。壺中日照幾千秋。  
諸郎各奪青雲路。我輩宜居白玉樓。  
笑把庚辛齊撒手。誰將甲子記從頭。  
蓬山會上年年樂。不唱紅塵懊惱謳。

附髯仙雙清閣原韻

撐腸文字五千卷。轉眼蓬山八百秋。  
點點星光寒墮水。茫茫雲氣遠吞樓。  
沙中寫了詩無數。閣外栽將竹萬頭。

風到齊聞笙韻發。道人拍掌正清謳。

冬至

昨日陽伏陰。今日陰見陽。陰陽晴隔隔。  
送客到山堂。山堂脫木響。蕭蕭十月霜。  
霜多陰氣沍。隱隱雁南翔。洞庭發長嘯。  
一笛過三湘。

元夕軒然臺

高會逢元夕。樓臺與歲新。江山儼如畫。  
燈火盡皆春。洒落千山雨。消除萬里塵。  
濛濛烟樹月。此處見吾真。

清漪觀

青衣水繞清漪觀。滿眼清漪畫者希。

江上晚烟帆影遠。樹中春雨磬聲微。  
何年結下長生社。此處頻來寶杖飛。  
蓑笠老翁人不識。口邊閒唱鶴來歸。

西江月

門外渾忘宇宙。壺中不計春秋。三月歸來樂自由。滿眼  
江山如舊。花木及時栽植。亭臺到處優游。自古名山住  
我儔。對境吟詩酌酒。

道院即事

春陰黯黯護元門。檻外花枝嫩有皴。  
盡日垂簾相對坐。無聲無色話京因。

書軒然臺匾

諸子今宵共一齋。道人自寫軒然臺。

豈惟諸子談奇妙。即我亦誇筆神來。  
海水天風隨五肘。拈毫不覺龍蛇走。  
動搖五嶽凌滄洲。四座欣欣笑拍手。  
笑拍手。笑拍手。字跡永存臺不朽。

仙家樂用涵虛韻

空青洞裏道人家。靜靜清清遠俗譁。  
瀑布倒飛丹嶂雨。山塘間種白蓮花。  
林間把酒消清晝。石上橫琴抱落霞。  
此是修真好去處。何須海嶽問靈砂。

附原作○蓬萊島上古仙家修煉長生遠世譁鐵樹常  
標千歲鶴瑤峯笑採四時花眠龍喚起游青嶂猛虎騎  
來到赤霞吹片白雲封  
了洞一爐純火養丹砂  
老游仙圖

八百三千數早贏。而今善果更如京。  
奇蹤異蹟頻頻著。竹杖棕鞋處處行。  
千歲翁皆成故友。萬年歷與紀長生。  
年來溷跡游塵世。又學浮邱易姓名。

附 呂祖和作

久隨日月辨虛贏。未領雲霞飛玉京。  
五老應添六老坐。八公常餞九公行。  
山間每遇赤松子。世上渾疑白石生。  
今古事情都看破。十洲三島盡知名。

附 涵虛同作 ○昨夜吹簫女姓贏 讓他年少步天京 風塵  
溷跡誰知到月夜飛空 漢曾師乾竺 古先生芝苓 頓頓家  
獨自早學人間都散漢 曾師乾竺 古先生芝苓 頓頓家  
常足海嶽遨遊得壽名 壽名 壽名 壽名 壽名 壽名 壽名  
附 藏崖同作 ○昔從老子避秦嬴 百世年華莫與京 古髯

長髯飄洒洒三山五岳  
唱行行曾燒大藥用無盡  
清淺已忘其姓與其名  
附蟠山同作○神丹餌後氣充羸  
雲水道遙遍四京天地  
同流真快活海山長嘯  
獨游行養成老鶴胎重孕食過蟠桃寔又生  
鸞馭偶臨彭祖墓笑他導引枉沽名

老隱仙圖

先入桃園避亂羸。不隨偽隱謁神京。  
家移翠嶂心逾靜。話到紅埃足懶行。  
抱甕丈人呼至友。接輿狂士拜先生。  
兒孫箇箇調鸞鶴。忘却塵中利與名。

附 呂祖和作

化爲鸞鶴氣羸羸。壽考年來近百京。  
洞裏烟霞長嘯傲。山中日月自流行。

種瓜不類東陵子。逃世能先北郭生。

溪水桃花隔塵世。未聞時事與時名。

附涵虛同作○辟世那知項滅嬴並忘劉闢漢西京芝  
田十畝呼龍種藜杖一枝趨鹿行古洞心空長自得多

年齒落又種生青溪白石趣

閒來往總是埋名與避名已長嬴無慮免京京放

附藏崖同作○手種青松定止行秋圃春田遊太古漁

懷箕穎空天地陪伴巢由已長嬴無慮免京京放

山樵水過平地不千半點由定止行秋圃春田遊太古漁

塵埃事直以無名作吏隱學侯嬴跨犢高歌勝跨京猿

附蟠山中曾變化○不為吏隱學侯嬴跨犢高歌勝跨京猿

鳥隊中曾變化○不為吏隱學侯嬴跨犢高歌勝跨京猿

髻蒼髯是友變化○不為吏隱學侯嬴跨犢高歌勝跨京猿

高尚志清風久不慕榮名

南峯

隨興游山即愛山。山中山外與雲還。

青蓑綠笠行峯頂。初五峩眉月正彎。

潮陽宮

蛩語啾啾鬧佛堂。極淒涼處不淒涼。  
閒吟十二欄干外。月色朦朧到上方。

山齋夜集

清風洒洒飄林外。涼月纖纖挂竹梢。  
此夜花齋同把酒。談元拍手盡仙曹。

烏尤絕頂

大江外帶夾城來。霽色清明瓦屋開。  
外看孤帆雲共遠。中藏深院竹相隈。  
奇峯直抵波濤壯。爽氣遙飛煙霧回。  
此地真成方外勝。携壺踏葉上高臺。

游青衣山

新晴山色好。趁此訪青衣。客整衝雲屐。

村飄賣酒旗。携壺踏高頂。掃石話元機。  
此境誰堪比。金陵燕子磯。

游砥柱山

路從怪竹叢中過。人自高峯頂上行。  
暫掃苔花相坐語。桂林深處午鍾清。  
松外時聞百鳥音。探幽携手上高岑。  
聊借桂宮書小句。一山風送靜中吟。  
花朝時節百花香。訪勝提壺到上方。  
我愛烏尤奇絕處。烟霞來抱老文昌。  
入翠微兮出翠微。烏尤山裏白雲飛。  
松林竹島相縈拂。長嘯一聲天外歸。

竹抱齋聽門人楊蟠山讀予雲水前集

楊生矯矯瘦丰姿。愛我當年雲水詩。  
竹院清風明月夜。聽他搔首詠遲遲。

宴聽潮軒送李西來之閬中

歸來來又去。去去早歸來。酒共離人飲。  
軒因送別開。潮聲驅遠岸。月色冷空杯。  
挽客重排宴。池邊共往徊。

題竹抱齋

曲徑通幽遠世喧。空齋半背倚深村。  
樓鍾縹緲來雲際。欄檻迴環遶石根。  
修竹千頭栖鳥友。小塘一口種漁孫。  
最憐雨後排窗望。無數青山到寺門。

花酒吟

花開可喜落堪哀。莫放花前酒數杯。  
飲酒簪花神氣爽。有花有酒去還來。

題印月涵日二池

紅欄倒印詩仙院。碧水深涵我佛居。  
好是紫薇花下看。枝枝樹影立池魚。

天門引二首

穩步天門笑眼開。黃金爲殿玉爲臺。  
凡人莫望仙車引。自駕雲梯許上來。  
欲問雲梯何處通。雲梯即在汝身中。  
若知煉集還丹妙。平地飛昇上碧空。

詩仙院祀太白東坡

瓣香常拜兩公詩。文彩風流後進師。

千古精神若相接。大家乘月上峩眉。

元夕過楊子新築蟠山草堂

我是三丰叟。門橫一字山。今宵來汝宅。  
風景甚相闌。春氣臨新舍。林塘入小灣。  
楊家清白第。果爾出塵寰。

軒然臺

軒然臺上客。靜坐遠塵氛。樹影浮丹嶂。  
鐘聲叩白雲。三峩空際立。九頂望中分。  
好是長江上。秋潮靜夜聞。

江樓

分神游海嶽。長嘯過江峯。  
秋氣滿樓閣。高窗雲自封。

長乙山房留題

不可居無竹。悠然別有天。廬中藏日月。  
崖外擁林泉。詩酒娛千古。乾坤付七絃。  
最憐好風景。燈月照門前。酒多詩益放。  
山靜室彌清。今夕乃何夕。筆情談道情。  
案頭千字古。簷外一燈明。縱自觀村落。  
主人雅趣生。

題道德經東來正義

回翁首序定評論。自叙尤開入德門。  
又見闕中來紫氣。真看李下毓玄孫。  
欲教後世人同度。能使先天道益尊。  
多少註家推此本。寶函長護鎮崑崙。

自焚畫下火偈

天仙不滯舊形軀。一畫何能見道歟。  
烈火光中今日去。陽神粉碎滿空虛。

軒然臺

白雲深處曉雞鳴。聽到銅壺第五更。  
羣雁早衝秋塞遠。七星高映斗壇清。  
乾坤大笑無邊際。海島飛吟有色聲。  
好是山樓橫玉笛。早秋斜月過江城。

用長乙韻

山居休說軟紅事。門外長留濯錦江。  
處處栽根延命藥。時時打箇定心椿。  
我來綺閣風生座。人誦黃庭日滿窗。

最愛九秋情意好。羽人同唱羽衣腔。

最淒涼

嘆世人塵情不了。全不想世外逍遙。  
家中喪却無價寶。將何買路登三島。  
空老。空老。

和呂純陽先生原韻

和聲常用笛。煉氣不離琴。寄語圓陽子。  
須知大道情。天開孤月照。雲起萬山沈。  
別島閑居客。何勞訪大林。

雙清閣同飛仙聯句限十五咸韻

小設蓬山宴。涼宵入翠巖。乾坤游客路。  
天地散人銜。大嘯雲中鶴。遙呼海上帆。

杪羅三島樹。仙雁九秋緘。笠戴瀛洲雨。  
烟披火浣衫。鳳簫吹瑟瑟。龍馭出巉巖。  
折柬邀明月。題詩寫赤函。瓊漿排畫閣。  
寶杖倚星杉。此地原離垢。羣真盡隔凡。  
霓裳歌上界。瑤草拾靈岩。笑語滄桑事。  
鋪陳石鼎瑊。昂頭空碧落。賡韻答韶咸。

冬日自蓬萊至蜀之行雲閣

飛身嘯出海門東。又別蓬萊到此中。  
滿腹元精凝耿耿。從頭妙手運空空。  
萬行草字雙毫落。千嶂煙霞一路紅。  
試看蜀山山疊秀。最憐木葉褪霜楓。

聞涵虛山人彈琴時秋雨初收雁聲過塞時也

雨餘山靜聽絲桐。寶篆銀燈照閣中。  
欲與太無相混合。直令諸有盡皆空。  
江聲遠應月搖水。嵐氣初沈風入松。  
最愛清心傳指上。不須舉目送飛鴻。  
得句示居士

風送灘聲來閣上。雲將雨氣入山中。  
西崖伐木聞柴斧。北澗鳴榔放釣筒。  
我與漁樵相溷跡。誰知山水隱仙翁。  
笑將得句傳居士。方外來尋路可通。

聯句

共此好風日。  
韓清  
。羣真相唱酬。  
白紫  
。  
長歌空世界。  
邱長  
。一笑度江樓。  
三白  
。

氣與乾坤合

韓清夫邱長春

。心同水月幽

清白紫

。

古今多少事

邱長春

。忘却洞天秋

三丰

。

### 清吟

清茗清香清道心。清齋清夜鼓清琴。

人能避濁談清靜。跳入雲山不可尋。

### 初春偕李長乙過蟠山小飲

東風如大藥。一至活枯荄。徑草茸茸合。

園林處處皆。菜花黃似染。村水淨於揩。

並愛南溪上。青山氣象佳。

### 贈李圓陽

萬無解印還家後。再有貪凡下界時。

只把性天朝暮養。休將心地鬼神知。

乾坤浩盪琴三弄。氣息調和笛一枝。  
欲向陰陽修出世。須從陰陽外修之。

重九日與回翁及藍養素白玉蟾同游峩眉

雨後飛行上大峩。塵寰下視瘴煙多。  
羣真雅集成高會。萬里空明各放歌。  
鶴嘯入雲藍板和。鸞鳴通漢白車過。  
獨餘呂老無詞曲。揮劍穿崖笑擘窠。

重陽後一日

煙村江樹景茫茫。畫意詩情引興長。  
寄語山壇諸弟子。不妨賞雨補重陽。

約諸子游青城洞天二首

欲尋仙院訪仙蹤。請上岷山第一峯。

十月小陽春氣好。洞天深處話從容。  
仙院依然展碧窗。青城細話景無雙。  
一聲清磬雲門曉。山月依樓未過江。

新津老君山

手招仙客上雲霄。張子來吹碧玉簫。  
太清妙境誰能識。只在中山認沓寥。  
哈哈。攜手逍遙。呵呵。同步天橋。  
兩箇葫蘆盛美酒。大家同醉訪松喬。

長生宮

翠木參天處。雲行到此宮。路抄黃葉外。  
山在赤城中。別院供回老。遺輝想范公。  
來朝凌絕頂。浩氣馭長空。

飲鶴巢亭

仙家小飲最高峯。  
正在青城一點中。  
無數白雲圍几席。  
插天屏障列西東。

天師洞木橋

木橋橫過碧雲溪。  
流水聲中綠影低。

好在兩山崖合處。  
聽他仙鳥隔林啼。

青城山聯句

活同道士樂長吟。  
呂純陽。天外飛行步碧岑。  
三丰。

山喜來龍開大面。  
劉海蟾。仙皆停鶴話同心。  
清白紫。

三台隱隱衝烟出。  
山中。九室層層入霧深。  
三丰。

猶憶當年離世網。  
劉海蟾。飄然雲路詠松陰。  
清白紫。

白雲青雲兩溪

雲行風淡淡。山靜水潺潺。不盡清涼意。  
都來泉石間。道人吹鉄笛。老衲閉柴關。  
信步東西澗。高真共往還。

鶴鳴山

道士來時石鶴鳴。飛神天谷署長生。  
只今兩澗潺湲水。助我龍吟虎嘯聲。

天谷洞

天谷本天生。長歌石竅鳴。  
棲神須此地。坐煉大丹成。

贈長乙山居主人

秋雨連宵暑氣除。中元佳夕畫難如。  
溪風嶺月神仙友。豆架瓜棚處士廬。

我輩遵行老氏法。山人能註孔門書。  
焚香讀易談玄理。儒道同源天地初。

秋晚至岳雲樓

秋江樓上看秋燈。點點秋燈照水明。  
我自兩湖吟到此。長天空闊有餘聲。

縹緲山戲招圓陽長乙

道士身藏縹緲山。洞門風細水潺潺。  
白龍高卧玉池冷。黃鶴暮歸松頂閑。  
手撚琪花凭石几。肩橫鉄杖步天關。  
二君早晚來相訪。三十六峯廿四灣。

游潮洋寺

吾從海嶽來。帶得海雲至。

敞神放雲飛。雲去封山寺。

游羅浮山

戲騎羅浮大蝴蝶。神游栩栩遍岑寂。  
忽然變出真容來。又是一蓑與一笠。  
玉蟾峯上且徘徊。遙見海瓊飛到來。  
二人拍手發長嘯。蒼崖疊巘何崔嵬。  
綠毛仙。黃野人。山中隱現多仙真。  
何不竟爲東道主。掃石安杯飲數巡。  
海風灑灑來天外。吹出羅浮好境界。  
快哉快哉真快哉。紫清携手歸蓬萊。

雨後看峩用坡仙句作起

峩眉翠掃雨餘天。渺渺吟情字字仙。

收拾嵐光歸筆下。放開豪氣立樓前。  
詩中有畫誰能悟。靜裏無愁最可憐。  
愛此烟霞鋪半壁。令儂幽興滿山川。

登瓦屋山

大岡高遠壓峩岷。頂上雲開眼界新。  
萬樹風號來虎氣。諸峯雨過出龍神。  
辟支崖有千秋雪。彌勒洞無半點塵。  
大地河山歸脚下。西方世界此超倫。

附蟠山同作○瓦屋山高一平天仙飛入化人城毫光  
放出雲光白爽氣收回石氣清萬壑松杉噓遠籟千崖  
雨露滴新晴條匹練從  
空落何瀉銀河更有聲

西北下雨東南晴。晴江忽見波濤生。

滿岸兒童齊拍手。山奔水立雷聲吼。  
劃然灘石浪衝開。如馬如牛逸蹄來。  
仙之人兮從空降。只見川心飛雪浪。  
化作浮槎蕩漾行。隨風逐浪到蓬瀛。

早秋山居

芭蕉雨過天然翠。菡萏風搖自在涼。  
正好談禪凭水閣。箇中又有木樨香。

雨中看覆蓬山

中峩不肯露長眉。正值斜風細雨時。  
漁父眼前同入畫。墨雲頭上急催詩。  
山如承蓋偏非小。峯以退藏益見奇。  
笑我一蓑兼一笠。與君相對兩迷離。

漢張桓侯誕日

在唐留姓陽宋留名武。萬古回環正氣撐。

殺賊雷霆走精銳。運籌冰雪淨聰明。

當陽唱震曹無色。刁斗銘傳漢有聲。

車騎英雄文武備。成都醉酒祀麾旌。

即景六言

疎雨梧桐滴瀝。秋風楊柳蒼黃。

行吟蓼花潭上。看出畫圖水鄉。

久雨

風風雨雨暗新秋。御氣仙人踏水游。

烟寺鍾聲雲外濕。江天帆影霧中收。

瑤壇早見月離畢。玉笛長吟風滿樓。

欲喚白龍歸洞去。天心人事兩悠悠。  
元夕後一夕同諸子集聽吟風館  
風竹瀟瀟韻滿樓。師生夜話在林邱。  
元宵已過何勞說。莫把光陰付水流。

示隱士二絕

久識團陽是隱星。峨眉山下養真靈。  
閒邀野士談丹訣。夜丹寒煙戶不扃。  
水田深處白雲飛。聽徹秧歌入翠微。  
昨夜鳩聲啼不斷。今朝細雨入茅扉。

題王生宅

半房山色映簷牙。綠竹陰陰照碧紗。  
老子於斯興不淺。桃源深處古人家。

携諸子游龍泓二絕

龍泓口內有青山。一灣一灣復一灣。  
試待晴明風日麗。又携雲屐試尋攀。  
正是山鍾打暮天。諸生請上草蒲團。  
吾將化箇雲仙子。來往樓中嘯晚烟。

迴軒然臺

今夕分神下太清。天風吹下玉簫聲。  
雲衢開展三霄靜。雪月交輝萬里明。  
候我全身騎鶴降。寄君一語待雞鳴。  
青衣島上清漪觀。樓閣參差似碧城。

暮春

今日好天氣。春風吹綠楊。水隨行客轉。

花自過溪香。蝴蝶飛依草。蜉蝣舞過牆。  
我觀諸造物。回首嘆滄桑。

清溪令 詞

春去多矣。聽杜鵑啼時。五更須起。烏尚勤勤。問蒲團  
中人。誰能遣此。欲使神活心先死。死心漢。即是那神  
仙種子。

即景示諸子

知音從古少。山色雨餘多。點點雲邊出。  
巍巍嶺上過。林泉風日靜。野寺水烟和。  
一樣池中物。紅渠映綠波。

銷夏

銷夏宜於古佛樓。羣山衆水座前收。

江風滿袖雲濤吼。一笑長吟浩氣流。

夏杪軒然臺二首

滾滾灘聲到寺門。登樓倚閣四山昏。  
只餘一點紅缸照。笑共遊仙把酒樽。  
風雨瀟瀟入畫樓。山氣清涼已近秋。  
隔江野樹雲烟繞。似倩倪迂筆裏收。

新秋

斗柄橫天漢。新秋漸指西。  
梧桐風乍起。吹月過橋隄。

新秋夜雨示團陽

說道談元不計年。逍遙物外古神仙。  
塵塵掃去根根淨。始得吾家最上禪。

秋色從西萬里來。  
梧桐雨落到蒼苔。  
笑拈幾句題山石。  
吟罷嫣然對酒盃。

高樓秋夜

夜靜高樓上。  
秋江見遠燈。  
漁家相笑語。  
並坐補絲繒。

秋雨

漏天風雨洒。  
平地水雲生。  
飄飄一笠行。  
飛仙誰見影。  
來雁未聞聲。  
我更騎鴻去。  
瀟湘接海晴。

秋夜聞雁

雨聲浙瀝到三更。  
野寺鳴鐘分外清。  
正逢雁字橫秋塞。  
風雪關山一萬程。

稻梁澤國知何處。我笑飛鴻向南度。  
長空碧宇嘆宵征。神仙跨汝瀟湘去。

秋晴示團陽

皇天施好雨。陂塘秋水肥。烏酣紅稻剩。  
仙駕白雲飛。物我各閑適。乾坤隨所歸。  
神游嬉造化。氣聚歛禪扉。雅興連丹嶂。  
高吟動翠微。新詩隨地賦。別壁寫苔衣。

九日登軒然臺

去年今日會山亭。天爲重陽特放晴。  
今歲依然循此例。道人初打午鍾清。

寒露

此日逢寒露。深宵白露清。涼秋來塞外。

黃葉下林端。遠嶂燈光出。高雲雁語盤。  
笑吹長笛去。樓閣倚飛欄。

秋夜萬景樓

隨意登臨到此來。天風莽蕩撼樓臺。  
揮毫直拂煙霞起。隔岸漁燈出水隈。

秋日東坡樓

七星花發照樓前。暮落朝開最可憐。  
賴有拒霜心一點。故將秋色更增妍。

瓶梅

天寒玉蕊正含香。雪地栽培氣候長。  
莫把銅瓶來供養。始能留得滿庭芳。

秋景

江雲隱隱認沙洲。又聽鍾聲出寺樓。  
我欲凌風一長嘯。數羣鴉噪隔烟浮。

對景

樓外大江來。青山隔岸開。  
峩雲遮不斷。我自海峯回。

秋日與諸生集軒然臺飲酒雜唱

拍掌臨風嘯。清謳滿座聽。水光浮檻白。  
山氣入樓青。把酒談玄理。當窗誦道經。  
諸天應大笑。師弟各忘形。

秋夜與諸生復集軒然臺

細雨紗窗外。虫吟不忍聽。雲封千樹黑。  
夜靜一燈青。禁句誰能道。前人總未經。

自拈蕉葉寫。草字作龍形。此樂今年少。  
今宵莫負之。聽風兼聽雨。談道復談詞。  
各唱無根樹。休跨限韻詩。不拘諸法律。  
高詠自怡怡。

月裏江山

江山月裏畫中求。倚閣開窗遠近收。  
峯頂壓雲深入夜。竹稍沾露重凝秋。  
虫聲唧唧啼苔砌。燈影熒熒照樹頭。  
遙看榕陰涵晚霧。濛濛烟樹隱高樓。

秋夕

淡淡星河夜。秋風響桂林。涼雲三徑曉。  
冷露一樓侵。竹影高懷僻。山居道意深。

邇來無別語。塵擾漫闌心。

堪嘆

堪嘆世人不學仙。四時常怕病來纏。  
豈知一氣原無敵。氣滿身中命可延。

笑呵呵

笑呵呵。復高歌。風流醉舞出煙波。  
披漁蓑。走岩阿。日暮江山樂事多。  
我在斜陽村外過。何人知我醉婆娑。

與諸子定雨

今日東南大雨行。槐風梅雨甚闌情。  
上天不與分明說。箇裏陰陽一炁成。

愛竹堂

白雨清風。灑然來自蓬宮。瓊花滿地香冉冉。撲上簾櫳。  
。者三伏天氣。人間盡在熱惱中。爭如我仙家快樂。也  
海上飛蓬。

喜光於來岳雲樓

有緣千里來相會。無累一身任遨遊。  
我愛閩州李居士。飄然來到岳雲樓。

樂樂樂

說說說。樂樂樂。風正停。月未出。灘正明。秋氣肅。  
我有一道情。深深淺淺說。人能脫盡塵中俗。後天真氣  
頻溫服。不怕風寒。不遭瘟疫。年可延兮嗣可續。萬般  
都是精神作。精神作兮獲多福。不要符來不要藥。但遇  
天行盡。掃却樂樂樂。

曉吟

日觀峯頭趁曉來。忽聞山寺鼓種催。  
扶桑頂上天雞唱。一帶紅霞曙色開。

示朱生李生

二子將稀古。抽身遠市喧。澄心宜寡欲。  
養氣戒多言。闔水辭千里。佳山住一番。  
從今尋本性。自此脫塵樊。

題族人德軒墓

孝友人家百忍堂。能修祖德自留芳。  
德軒穩卧方山下。產作靈芝九朶香。

示劉白酒李魚溪

白酒漁竿客。青山道衲風。二生皆可笑。

年壯髭鬚翁。世外烟霞古。江邊氣象空。  
早研清淨理。幾片白雲中。

尋幽

雅水雅山尋雅士。嘉山嘉水樂嘉賓。  
偶聞雲外青鸞語。知有蓬萊客到門。

新秋即事仿回翁體

新秋新雨後。月出嫩涼生。江影涵空碧。  
星光照太清。憑樓吹玉笛。跨鶴度瑤京。  
往來無定所。飛嘯步蓬瀛。

送閬泉閬山歸閬中同碧城道人聯句

雲水客如雁三。新春向北歸碧。關山千里遠三。  
道德一身肥碧。不問亭長短三。那知世是非碧。

飄然任來去。三。臘岸柳依依。碧城。

仲春初旬示諸生

一年不與一年同。歲月猶如箭脫弓。  
花下團圓春宴好。振將吟興唱和風。

飛吟

朗吟雲夢曉。飛過洞庭春。飄然無定所。  
掉臂入峩岷。呵呵。者風流誰得似也。  
曰。回道入。

題麻仙姑聽何仙姑次笙圖

按行蓬島入雲天。欲訪青霞女洞仙。  
一曲瑤笙何韻冷。別來閨苑已千年。

字叔綱號灼菴衡陽人成均士

武當南岩三丰先生煉丹處集雲水詩玄要篇句  
流水行雲不自收。一聲長嘯楚天秋。  
直尋世外千年藥。忘却人間萬斛愁。  
自是清空通沆瀣。常將冷眼看公侯。  
洞中藏得小天地。養就還丹距鶴遊。

又

面壁調神又九年。誰知幽客自陶然。  
黍珠一粒包天地。鐵笛雙吹破曉烟。  
節慾澄心澹神慮。埋名隱姓如瘋顛。  
煉成大藥超凡去。撒手逍遙物外仙。

詠史

明帝訪三年。十年不可得。聞在南山南。

已往北山北。到處樂逍遙。奇名稱邈邈。  
廣莫即吾鄉。太和爲我宅。是時方士流。  
自獻何紛沓。先生愧勵之。墨中獨見白。  
天海落雲聲。風塵難物色。飛龍又潛龍。  
隱顯誰能測。